


六韜直解

四



虎齋

			五	漢
		三	三	書
		〇	〇	門
六	四	一	一	
册	架	函	號	類

庫	文	閣	內
五	九	五	漢
函		三	書
一	六	〇	
架	册	一	類

內閣文庫	
番號	漢 5301
冊數	6 (4)
函號	299 197



六韜直解卷第四

虎韜

軍用第三十一

軍用者軍之器用也器用有備以
之戰守則無患矣

武王問太公曰王者舉兵三軍器用攻守之
具科品衆寡豈有法乎

武王問太公曰王者舉兵征伐三軍之器
用其攻守之具科品或衆或寡豈有法度

淺草文庫

乎

太公曰大哉王之問也夫攻守之具各有科品此兵之大威也

太公對曰大哉王之所問也夫攻守之器具各有科品此兵家之大威也

武王曰願聞之太公曰凡用兵之大數將甲士萬人法用武衛大扶胥三十六乘材士強弩矛戟爲翼一車二十四人推之以八尺車輪車上立旗鼓兵法謂之震駭陷堅陳敗強

敵

武王曰願聞科品之異太公對曰凡用兵之大數將帶甲之士萬人其法用武衛大扶胥三十六乘扶胥車之別名也材勇之士持強弩矛戟爲羽翼每一車用二十四人推之用八尺車輪車之上立旗與鼓兵法又謂之震駭用以陷堅陳敗強敵也

武翼大櫓矛戟扶胥七十二具材士強弩矛戟爲翼以五尺車輪絞車連弩自副陷堅陣

敗強敵

武翼大櫓車上之蔽也置矛戟於車上備擊刺也材勇之士持強弩矛戟爲羽翼用五尺車輪以絞車連弩自副亦用以陷堅陣敗強敵也

提翼小櫓扶胥一百四十九絞車連弩自副以鹿車輪陷堅陣敗強敵

提翼小櫓亦車上之蔽但比大櫓差小耳以絞車連弩自副用鹿車輪亦以陷堅陣

敗強敵也

大黃參連弩大扶胥三十六乘材士強弩矛戟爲翼飛鳧電影自副飛鳧赤莖白羽以銅爲首電影青莖赤羽以鐵爲首畫則以絳縞長六尺廣六寸爲光耀夜則以白縞長六尺廣六寸爲流星陷堅陣敗步騎

大黃參連弩大扶胥二十六乘以材勇之士持強弩矛戟爲羽翼上用飛鳧電影自副飛鳧用赤莖白羽以銅爲之首電影用

青莖赤羽以鐵爲之首白晝則以絳色之
縞長六尺濶六寸爲光耀遇夜則以白色
之縞長六尺濶六寸爲流星取其遠視之
有光也此用以陷堅陣敗步騎也
大扶胥衝車三十六乘螳螂武士共載可以
擊縱橫敗強敵

衝車從傍衝擊者也螳螂虫名有奮擊之
勢故取以爲名

輜車騎寇一名電車兵法謂之電擊陷堅陣

敗步騎

輜車騎寇疑有誤字電車言其忽往忽來
如電之疾也故兵法謂之電擊

寇夜來前矛戟扶胥輕車一百六十乘螳螂
武士三人共載兵法謂之霆擊陷堅陣敗步
騎

寇遇夜來吾營前矛戟扶胥輕車一百六
十乘每乘螳螂武士三人共載兵法謂之
霆擊言其輕疾往來如雷霆之擊也

方首鍬倍維盼重十二斤柄長五尺以上千
二百枚一名天倍

維盼未詳或曰盼大首也重一十二斤

大柯斧刃長八寸重八斤柄長五尺以上千
二百枚一名天鉞方首鍬槌重八斤柄長五
尺以上千二百枚一名天槌敗步騎群寇

言三者皆可用之敗步騎群寇也

飛鈎長八寸鈎芒長四寸柄長六尺以上千
二百枚以投其衆

用飛鈎以投敵軍之衆也

三軍拒守木螳螂劍刃扶胥廣二丈百二十
具一名行馬

三軍與敵拒守用木螳螂劍刃扶胥廣濶
二丈一百二十具一名曰行馬

平易地以步兵敗車騎木蒺藜去地二尺五
寸百二十具

平易之地以步兵敗敵之車騎用木蒺藜
去地高二尺五寸一百二十具

敗步騎要窮寇遮走北軸旋短衝矛戟扶胥
百二十具黃帝所以敗蚩尤氏

敗敵之步騎要截窮寇遮攔走北旋軸短
衝矛戟扶胥用一百二十具黃帝昔日所
以敗蚩尤氏也

敗步騎要窮寇遮走北狹路微徑長鍊蒺藜
芒高四寸廣八寸長六尺以上千二百具
言狹路微徑用鍊蒺藜以敗步騎要窮急
之寇遮走北之人也

敗走騎突瞑來前促戰白刃接張地羅鋪兩
鍊蒺藜參連織女芒間相去二尺萬二千具
敗走騎及衝突瞑黑之時而來前促戰白
刃相接則張設地羅鋪兩鍊蒺藜并參連
織女芒刃之間相去二尺一萬二千具
曠野草中方宵鎡矛千二百具張鎡矛法高
一尺五寸敗步騎要窮寇遮走北

曠野深草之中用方宵鎡矛一千二百具
張鎡矛之法高一尺五寸用以敗敵人之

步騎要截窮寇遮隔走北也

狹路微徑地陷鑿械鎖參連百二十具敗步騎要窮寇遮走北

狹窄之路微小之徑地內陷以鑿械鎖參連者一百二十具亦可以敗步騎要窮寇遮走北也

壘門拒守矛戟小櫓十二具絞車連弩自副三軍拒守天羅虎落鎖連一部廣一丈五尺高八尺百二十具虎落劔刃扶胥廣一丈五

尺高八尺五百一十具

此三者皆拒禦之器也

渡溝塹飛橋一間廣一丈五尺長二丈以上著轉關轆轤八具以環利通索張之著以轉關轆轤欲易動也張以環利通索欲堅固也此踰垠之具也

渡大水飛江廣一丈五尺長二丈以上八具以環利通索張之天浮鑿螳螂矩內負外徑四尺以上環絡自副三十二具以天浮張飛

江濟大海謂之天潢一名天船
飛江天潢皆濟大水之具也天浮鍤螳螂
用以張飛江者也
山林野居結虎落柴營環利鍤鎖長二丈以
上千二百枚環利大通索大四寸長四丈以
上六百枚環利中通索大二寸長四丈以上
二百枚環利小微縲長二丈以上萬二千枚
天雨蓋重車上板結泉鉏鋸廣四尺長四丈
以上車一具以鍤杙張之

環利鐵鎖通索微縲即今之連環鍤索也
但有大小長短之異耳天雨蓋車上之板
也結泉鉏鋸刻板爲齒不相值也杙擐也
鍤杙以鍤爲擐也

伐木天斧重八斤柄長三尺以上三百枚檠
鑿刃廣六寸柄長五尺以上三百枚銅築固
爲垂長五尺以上三百枚

斧用以斫鑿用以斲銅築固爲垂未知何
用

鷹爪方宵鍤杷柄長七尺以上三百枚方宵
鍤义柄長七尺以上三百枚方胸兩枝鍤义
柄長七尺以上三百枚芟草木大鎌柄長七
尺以上三百枚大櫓刃重八斤柄長六尺三
百枚委環鍤杙長三尺以上三百枚椽杙大
槌重五斤柄長二尺以上百二十具
委環鍤杙者以鍤爲槩上連以環也椽擊
也

甲士萬人強弩六千戟櫓二千矛楯二千脩

治攻具砥礪兵器巧手三百人此舉兵之大
數也武王曰允哉

脩治欲其常完也砥礪欲其常銳允者信
其言也

三陳第三十二

三陳者天地人三陳也

武王問太公曰凡用兵爲天陳地陳人陳奈
何太公曰日月星辰斗柄一左一右一向一
背此謂天陳

武王問太公曰凡用兵之法爲天陳地陳
人陳其說如何太公對曰取日月星辰斗
柄一左一右一向一背之象此謂之天陳
丘陵水泉亦有前後左右之利此謂之地陳
右背山陵前左水澤取其便利此謂之地

陳

用車用馬用文用武此謂人陳武王曰善哉
車革車也馬騎兵也文以附衆武以威敵
此謂之人陳

疾戰第三十三

疾戰者在圍地而戰欲疾也

武王問太公曰敵人圍我斷我前後絕我糧
道爲之奈何

武王問太公曰敵人圍我三軍斷我之前
後絕我之糧道將爲之奈何

太公曰此天下之困兵也暴用之則勝徐用
之則敗如此者爲四武衝陳以武車驍騎驚
亂其軍而疾擊之可以橫行

太公對曰此乃天下之困兵也暴疾而用之則致勝徐緩而用之則致敗如此者爲四武衝陳以武車驍騎驚亂其軍而疾擊之則可以橫行矣四五衝陣者謂以武士結爲四陣併力而衝擊之耳

武王曰若已出圍地欲因以爲勝爲之奈何太公曰左軍疾左右軍疾右無與敵人爭道中軍迭前迭後敵人雖衆其將可走

武王曰若我已出圍地欲因之以爲勝將

爲之奈何太公對曰左軍疾擊而左右軍疾擊而右無與敵人爭道與敵爭道則我之力分亦恐彼有伏也今吾中軍更迭而前更迭而後敵人雖衆其將可得而走矣

必出第三十四

必出者言陷在圍地而務於必出也

武王問太公曰引兵深入諸侯之地敵人四合而圍我斷我歸道絕我糧食敵人旣衆糧

食甚多險阻又固我欲必出爲之奈何

武王問太公曰若引兵深入諸侯之地敵人四面合而圍我斷我之歸路絕我之糧食敵人之兵旣衆糧食又多險阻又固我欲務在必出將爲之奈何

太公曰必出之道器械爲寶勇鬪爲首審知敵人空虛之地無人之處可以必出

太公對曰必出之道以器械爲寶以勇鬪爲首審知敵人空虛之地無人之處可以

必奮而出

將士持玄旗操器械設銜枚夜出勇力飛足
冒將之士居前平壘爲軍開道材士強弩爲
伏兵居後弱卒車騎居中陳畢徐行慎無驚
駭以武衝扶胥前後拒守武翼大櫓以蔽左
右

今將士人持玄色之旗操持器械設銜枚
以止語遇夜而出有勇力能飛走冒將之
士居前平治營壘與軍開道材勇之士持

強弩爲伏兵居後弱卒與車騎居中陳畢徐徐而行慎無驚駭以武衝扶胥前後拒守武翼大櫓以蔽左右防其衝突也武衝扶胥即大扶胥衝車武翼大櫓即矛戟扶胥皆用之拒禦而已

敵人若驚勇力冒將之士疾擊而前弱卒車騎以屬其後材士強弩隱伏而處審候敵人追我伏兵疾擊其後多其火鼓若從地出若從天下三軍勇鬪莫我能禦

敵人若驚擾吾勇力冒將之士疾擊而前弱卒與車騎以屬其後材士強弩隱伏而處審候敵人前來追我今伏兵材士強弩疾擊其後多其火鼓以亂其耳目若從地而出若從天而下三軍勇鬪而前則敵人不能禦我矣

武王曰前有大水廣塹深坑我欲踰渡無舟楫之備敵人屯壘限我軍前塞我歸道斥候常戒險塞盡守車騎要我前勇士擊我後爲

之奈何

武王問曰若吾營前有大水廣塹深坑我欲踰渡又無舟楫之備敵人屯壘限隔我軍前塞我之歸道斥度候望之人時常戒慎險塞之處盡爲固守車騎要截我軍前勇士襲擊我軍後將爲之奈何斥候者所以望烽燧檢行險阻伺候盜賊者也

太公曰大水廣塹深坑敵人所不守或能守之其卒必寡若此者以飛江轉關與天潢以濟吾軍勇力材士從我所指衝敵絕陳皆致其死

太公對曰大水廣塹深坑敵人所不守者若或能守之其卒必少如此者以飛江轉關與天潢以濟吾軍勇力材士從我所指而前進衝敵絕陳今皆致死以戰先燔吾輜重燒吾糧食明告吏士勇鬪則生不勇則死

先燔吾輜重燒吾糧食使士卒無迴顧之

心乃明告吏士若武勇而鬪則生不武勇而鬪則死

已出令我踵軍設雲火遠候必依草木丘墓險阻敵人車騎必不敢遠追長驅因以火爲記先出者今至火而止爲四武衝陣如此則吾三軍皆精銳勇鬪莫我能止武王曰善哉已出者令我踵後之軍張設雲火遠候必依倚深草林木丘墓險阻之處敵人之車騎不知我情必不敢遠追長驅吾軍因以

火爲號先出者今至火而止結爲四武衝陣如此則吾三軍皆精銳勇鬪莫我能止矣武王曰公言善哉踵軍解見尉繚子

軍略第三十五

軍略者行軍之謀略也謀略不先定不可以行軍矣

武王問太公曰引兵深入諸侯之地遇深溪大谷險阻之水吾三軍未得畢濟而天暴雨流水大至後不得屬於前無舟梁之備又無

水草之資吾欲畢濟使三軍不瞽留爲之奈何

武王問太公曰若引兵深入諸侯之地遇深溪大谷險阻之水吾三軍未得畢濟而天或暴雨流潦之水大至在後者不得屬於前無有舟楫之備預又無水草之資吾欲畢濟吾三軍使無瞽留者將爲之奈何太公曰凡帥師將衆慮不先設器械不備教不精信士卒不習若此不可以爲王者之兵也

也
太公對曰凡帥師將衆謀慮不先設器械不預備教道不精信士卒不練習如此不可以爲王者之兵也

凡三軍有大事莫不習用器械若攻城圍邑則有輜輶臨衝視城中則有雲梯飛樓三軍行止則有武衝大櫓前後拒守絕道遮街則有材士強弩衛其兩旁設營壘則有天羅武落行馬蒺藜

凡三軍有大事莫不習用器械若攻人之
城圍人之邑則有輶輜臨衝輶輜者四輪
車也解見孫子臨謂臨車從上臨下者也
衝謂衝車從旁衝突者也窺視城中則有
雲梯飛樓可以平地起望也三軍行止則
有武衝大櫓前後相拒相守絕道遮衝則
有材士強弩護衛其兩旁張設營壘則有
天羅武落行馬蒺藜之具

晝則登雲梯遠望立五色旌旗夜則火雲萬
炬擊雷鼓振輦鐸吹鳴笳

白晝則登雲梯遠望立五色旌旗以變敵
人之目遇夜則設火雲萬炬擊雷鼓振輦
鐸吹鳴笳以變敵人之耳即孫子晝戰多
旌旗夜戰多火鼓之意

越溝塹則有飛橋轉關輶輜鉏鋸濟大水則
有天潢飛江逆波上流則有浮海絕江三軍
用備主將何憂

越絕溝塹則有飛橋轉關輶輜鉏鋸之具

濟渡大水則有天潢飛江之具逆波之上
流則有浮海絕江之具三軍器用全備爲
主將者又何憂乎

臨境第三十六

臨境者與敵人臨境相拒也

武王問太公曰吾與敵人臨境相拒彼可以
來我可以往陣皆堅固莫敢先舉我欲往而
襲之彼亦可以來爲之奈何

武王問太公曰吾與敵人臨境而相拒守
彼軍可以來我軍可以往彼我之陣皆堅
固莫敢先舉動者我欲往而襲取之彼亦
可以來襲我將爲之奈何

太公曰分兵三處令我前軍深溝增壘而無
出列旌旗擊鼙鼓完爲守備令我後軍多積
糧食無使敵人知我意發我銳士潛襲其中
擊其不意攻其無備敵人不知我情則止不
來矣

太公曰如此者分兵爲三處令我前軍深

溝增壘而無出列旌旗擊鼙鼓完爲守禦
之備令我後軍多積糧食無使敵人知我
進退之意然後發我勇銳之士潛襲其中
擊敵人之不意攻敵人之無備敵人既不
知我情則止而不來矣

武王曰敵人知我之情通我之機動則得我
事其銳士伏於深草要我隘路擊我便處爲
之奈何

武王問曰若敵人知我之情狀通我之機

謀發動則得我事情其精銳之士或伏於
深草或要我隘路擊我便處將爲之奈何
太公曰令我前軍日出挑戰以勞其意令我
老弱曳柴揚塵鼓呼而往來或出其左或出
其右去敵無過百步其將必勞其卒必駭如
此則敵人不敢來吾往者不止或襲其內或
擊其外三軍疾戰敵人必敗

太公對曰如此者令我前軍日出與彼挑
戰以勞其意令我老弱者曳柴揚塵擊鼓

噪呼而往來以張其勢或出其敵之左或
出其敵之右相去敵人無過一百步之遠
其將必疲勞其卒必驚駭如此則敵人不
敢來吾往者不止或襲其內或擊其外三
軍疾戰敵人必敗矣

動靜第三十七

動靜者覘視敵人動靜設奇伏而
勝之也

武王問太公曰引兵深入諸侯之地與敵之

軍相當兩陣相望衆寡強弱相等不敢先舉
吾欲令敵人將帥恐懼士卒心傷行陣不固
後陣欲走前陣數顧鼓譟而乘之敵人遂走
爲之奈何

武王問太公曰若引兵深入諸侯之地與
敵人之軍相當彼此兩陣相望衆寡強弱
之勢相等各不敢先舉吾欲令敵人將帥
之心恐懼士卒之心悲傷行陣不堅固後
陣聞之欲走前陣今人數顧吾鼓譟而乘

之敵人遂走將爲之奈何

太公曰如此者發我兵去寇十里而伏其兩旁車騎百里而越其前後多其旌旗益其金鼓戰合鼓譟而俱起敵將必恐其軍驚駭衆寡不相救貴賤不相待敵人必敗

太公對曰如此者發我兵去寇十里而隱伏其兩旁車騎百里而踰越其前後多張其旌旗增益其金鼓戰合鼓譟而俱起敵將必恐懼其軍亦驚駭衆寡不相救援貴

賤不期待敵人必至於敗百里疑其太遠而與十里者難相救援也字恐誤

武王曰敵之地勢不可以伏其兩旁車騎又無以越其前後敵知我慮先施其備吾士卒心傷將帥恐懼戰則不勝爲之奈何

武王曰假若敵之地勢不可以隱伏其兩旁車騎又無以踰越其前後敵人知我謀慮先施其禦備吾士卒反心傷將帥反恐懼與之戰則不能勝將爲之奈何

太公曰誠哉王之問也如此者先戰五日發我遠侯往視其動靜審候其來設伏而待之必於死地與敵相避遠我旌旗踈我行陣必奔其前與敵相當戰合而走擊金而止三里而還伏兵乃起或陷其兩旁或擊其先後三軍疾戰敵人必走武王曰善哉

太公對曰誠哉王之所問也如此者先戰五日發我遠侯之人往視敵之動靜審候其來吾則設伏而待之必於死地與敵相

避避字恐是遇字言必於死絕之地與敵相遇而求一戰遠陳我旌旗踈列我行陣必奔其前務與敵人相當戰合而佯走擊金而無止將及三里而還軍伏兵乃起或陷敵之兩旁或擊敵之前後三軍併力疾戰敵人必敗走矣武王曰公言善哉

金鼓第三十八

金鼓者鼓以進之金以止之也此以金鼓名篇而篇內却不言金鼓

者未審何義

武王問太公曰引兵深入諸侯之地與敵相當而天大寒甚暑日夜霖雨旬日不止溝壘悉壞隘塞不守斥候懈怠士卒不戒敵人夜來三軍無備上下惑亂爲之奈何

武王問太公曰若引兵深入諸侯之地吾與敵相當而天或大寒或甚暑日夜遇霖雨旬日之間不能止矣軍之溝壘盡壞隘塞不能保守斥候之人懈怠士卒又不戒

嚴敵人遇夜而來三軍皆無備禦上下疑惑擾亂則爲之奈何

太公曰凡三軍以戒爲固以怠爲敗令我壘上誰何不絕人執旌旗外內相望以號相命勿令之音而皆外向三千人爲一屯誠而約之各慎其處敵人若來視我軍之警戒至而必還力盡氣怠發我銳士隨而擊之

太公對曰凡三軍以戒嚴爲固以怠惰爲敗令我壘上與誰何者不絕人執旌旗外

與內相望以號相命勿令絕音而皆外向
三千人爲一屯誠告而期約之各謹其所
守之處敵人若來視我軍之警戒嚴備至
我屯所必然還返力已竭盡氣已怠惰發
我精銳之士隨而擊之

武王曰敵人知我隨之而伏其銳士佯北不
止遇伏而還或擊我前或擊我後或薄我壘
吾三軍大恐擾亂失次離其所處爲之奈何
武王曰敵人知我隨之在後而隱伏其銳

士佯爲奔北不止遇伏兵而還返或擊我
之前或擊我之後或薄我之壘吾三軍大
恐懼擾亂失其次舍離其處所則爲之奈
何

太公曰分爲三隊隨而追之勿越其伏三隊
俱至或擊其前後或陷其兩旁明號審令疾
擊而前敵人必敗

太公對曰令我軍分爲三隊隨而追之勿
過越其伏兵之處三隊俱至或擊敵之前

後或陷敵之兩旁明吾之號審吾之令疾擊而前敵人必敗矣

絕道第三十九

絕道者敵人絕我糧道吾欲守之固而無所失也

武王問太公曰引兵深入諸侯之地與敵相守敵人絕我糧道又越我前後吾欲戰則不可勝欲守則不可久爲之奈何

武王問太公曰若引兵深入諸侯之地與敵人兩陣相守敵人斷絕我糧道又踰越我前後吾欲與之戰則不可勝欲固守則不可久將爲之奈何

太公曰凡深入敵人之境必察地之形勢務求便利依山林險阻水泉林木而爲之固謹守關梁又知城邑丘墓地形之利如是則我軍堅固敵人不能絕我糧道又不能越我前後

太公對曰凡引兵深入敵人之境必審察

地之形勢務求取便利之處依倚山林險阻水泉林木而爲之堅固謹守關塞橋梁又要知城邑丘墓地形之利如此則我軍堅固敵人不能斷絕我之糧道又不能絕越我之前後

武王曰吾三軍過大林廣澤平易之地吾候望誤失卒與敵人相薄以戰則不勝以守則不固敵人翼我兩旁越我前後三軍大恐爲之奈何

武王問曰吾三軍過大林廣澤及平易之地吾候望誤失倉卒與敵人相迫以之戰則不勝以之守則不固敵人來翼我兩旁越我前後吾三軍大恐則爲之奈何
太公曰凡帥師之法常先發遠候去敵二百里審知敵人所在地勢不利則以武衝爲壘而前又置兩踵軍於後遠者百里近者五十里即有警急前後相知吾三軍常完堅必無毀傷武王曰善哉

太公對曰凡帥師之法常先發遠候之人
離去敵人二百里審知敵人所在之處若
地勢不利則以武衝扶胥爲壘而前又置
兩踵軍於後踵軍收後之軍也遠者相去
百里近者相去五十里即有警急之事前
後皆得相知吾三軍常完堅必無有毀傷
者武王曰公言善哉

略地第四十

略地者戰勝深入略人之地也恐

敵有謀故武王以爲問而太公荅之
也

武王問太公曰戰勝深入略其地有大城不
可下其別軍守險阻與我相拒我欲攻城圍
邑恐其別軍卒至而薄我中外相合拒我表
裏三軍大亂上下恐駭爲之奈何

武王問太公曰戰勝深入略其地敵有大
城不可下其別軍固守險阻與我相拒我
欲攻彼之城圍彼之邑恐其別軍卒至而

迫我彼中外相合擊我表裏吾三軍大亂
上下恐懼驚駭爲之奈何

太公曰凡攻城圍邑車騎必遠屯衛警戒阻
其外內中人絕糧外不得輸城人恐怖其將
必降

太公對曰凡攻人之城圍人之邑車騎必
遠離城邑屯衛警戒隔阻其外內使不得
相通中人斷絕糧食在外不得輸送城中
之人恐懼畏怖其將必來降矣

武王曰中人絕糧外不得輸陰爲約誓相與
密謀夜出窮寇死戰其車騎銳士或衝我內
或擊我外士卒迷惑三軍敗亂爲之奈何

武王問曰中人斷絕糧食在外者不得輸
送彼陰爲期約信誓相與秘密而謀遇夜
出窮寇與我死戰其車騎銳士或衝我內
或擊我外吾士卒迷失疑惑三軍敗亂而
走則爲之奈何

太公曰如此者當分爲三軍謹視地形而處

審知敵人別軍所在及其大城別堡爲之置遺缺之道以利其心謹備勿失敵人恐懼不入山林即歸大邑走其別軍車騎遠要其前勿令遺脫

太公對曰如此者當分軍爲三謹視地形之便利而處之審知敵人別軍所在之處及其大城別堡爲之置遺缺之道以利誘其心吾則謹備而勿失敵人驚恐懼懼不入於山林即歸於大邑既走其別軍令車

騎遠要其前勿令有遺脫者

中人以爲先出者得其徑道其練卒才士必出其老弱獨在車騎深入長驅敵人之軍必莫敢至慎勿與戰絕其糧道圍而守之必久其日

城中之人以爲先出者得其徑道而往其練卒才士必從中出其老弱者獨在吾車騎然後深入長驅敵人之軍必莫敢至慎勿與之接戰斷絕其糧道環圍而守之必

能久其日矣

無燔人積聚無毀人宮室冢樹社叢勿伐降者勿殺得而勿戮示之以仁義施之以厚德令其士民曰幸在一入如此則天下和服武王曰善哉

無燔燒人積聚之物無毀壞人宮室冢上之樹社中之叢勿得斬伐來降者勿令殺之得士卒勿伐戮之示之以仁義施之以厚德如文王伐崇侯緩攻徐戰而示之以

仁慕容恪圍段龕築室及畊而施之以德是也今彼之士民曰幸在一入若能如此則天下皆和服矣武王曰公言善哉

火戰第四十一

火戰者彼以火攻我吾因火而與之戰也

武王問太公曰引兵深入諸侯之地遇深草蒹穢周吾軍前後左右三軍行數百里人馬疲倦休止敵人因天燥疾風之利燔吾上風

車騎銳士堅伏吾後三軍恐怖散亂而走爲之奈何

武王問太公曰若引兵深入諸侯之地遇深草蒺穢周匝吾軍前後左右吾三軍已行數百里人馬皆疲困勞倦休息止舍敵人因天時燥乾有疾風之利燔燒吾上風今車騎銳士堅伏吾軍之後吾三軍恐懼驚怖分散擾亂而走將爲之奈何

太公曰若此者則以雲梯飛樓遠望左右謹察前後見火起即燔吾前而廣延之又燔吾後敵人苟至即引軍而却按黑地而堅處敵人之來猶在吾後見火起必遠走吾按黑地而處強弩材士衛吾左右又燔吾前後若此則敵人不能害我

太公對曰如此者則以雲梯飛樓升高遠望左右兩旁謹察吾軍前後若見火起即先燔吾前而廣延之又燔吾軍之後敵人苟至即引軍而卻按黑地之中而堅處

強弩材士防衛吾左右又燔吾前後如此則敵人不能害我矣○愚謂深草蒺穢之地必不得已而欲舍止即先於營外斬除三二丈之廣使之靜潔若敵人四下焚我我於斬除靜地之外亦以火焚之彼火焚而入我火焚而出兩火相遇自滅若不斬除近營草焚吾先焚之恐風勢猛烈反延入我營矣如單于縱火焚李陵於大澤陵先於營外放火燒其葭葦奪其火勢是也

武王曰敵人燔吾左右又燔吾前後烟覆吾軍其大兵按黑地而起爲之奈何太公曰若此者爲四武衝陣強弩翼吾左右其法無勝亦無負

武王問太公曰敵人既燔吾左右又燔吾前後烟覆吾軍之上其大兵按黑地起而襲我則爲之奈何太公對曰如此者令吾軍爲四武衝陣以強弩翼蔽吾之左右其法彼此無勝亦無負謂兩軍皆有備故無

勝無負也

壘虛第四十二

壘虛者敵人以虛壘疑我我欲覘而知之也

武王問太公曰何以知敵壘之虛實自來自去

武王問太公曰以何術得知敵人營壘之虛實其軍自來自去

太公曰將必上知天道下知地利中知人事登高下望以觀敵之變動望其壘則知其虛實望其士卒則知其來去

太公對曰爲將者必上知天道之順逆下知地利之險易中知人事之得失登高阜以下望若無高阜平地則以雲梯飛樓起望以觀敵人之變動望其營壘則知其虛與實望其士卒則知其去與來

武王曰何以知之太公曰聽其鼓無音鐸無聲望其壘上多飛鳥而不驚上無氛氣必知

敵詐而爲偶人也

武王問太公曰何以知其然歟太公對曰聽其鼓又無音鐸又無聲望其壘上多飛鳥而不驚去營上又無氛埃之氣必知敵詐而守壘者皆偶人也如鄭人見楚幙有鳥而知其去是也

敵人卒去不遠未定而復反者彼用其士卒太疾也太疾則前後不相次不相次則行陣必亂如此者急出兵擊之以少擊衆則必敗

矣

敵人若倉卒而去不遠未定而復反者彼用其士卒太疾速也太疾則前後不相次序不相次序則行陣必擾亂如此者急出兵擊之以少卒擊彼之衆則必敗矣

六韜直解卷之四

Faint vertical text in columns, likely bleed-through from the reverse side of the page.

天保製本

